

CHIEF SECRETARY NOTES

Territorial Commander : Kan hnung thla kalta kha Territorial Commander tan chuan hunawl reng nei lovin Board Meeting te, Workshop leh Seminar te Territorial Council te hovin a buai hle a, heng bakah hian hun bik Corps Inkhawmna te hruaiin hun hlawk takin a hmang.

Executive Officers Meeting : 11th May, 2011 khan Territory chhunga Executive Officer te meeting THQ-ah neih a ni a, Division leh THQ-a awm te an kal kimin, thu pawimawh tak tak te sawiho-na hun hlu tak a ni.

Nute Ni : Territory pumah May thla chawlhni vawihniha kha Nute Ni a nih angina Centre tinrengah hlawk taka hman a nih thu report lawmawm tak tak dawn a ni. Nute Ni hi Territorial Commander chuan Thingsulthliah Corps-ah a hmanpui a, Officers Quarters thar hawanna leh hlanna a nei nghal bawk. Hemi hunah tho hian Chief Secretary te nupa chuan Chhawrtui Corps tlawhin Nute Ni inkhawm benglut tak an hmanpui. Chief Secretary te nupa hi Major Lianhlira leh CHAN Team ten an tawiawm a, anni ho pawh hian khawtlang huapin zirtirna pe in hun tha tak an nei bawk.

Candidate Final Contact : July 2011-a Training College a lut tur candidate mi 14 te tan THQ-ah Final Contact Period hman a ni a, an zirlai te tha taka an passed vek bakah Medical Test-ah te an tlin vek avangin kan lawmpui em em a ni.

Zoram Sipai Pawl Ni : Zoram pumah Sipai Pawl Ni hi urhsun taka hman a niin, Pathian hnena lawmthu sawina bakah Corps thenkhat ten Social Service neih nan te an hmang a, hmun thenkhat ruai nen he hun hlimawm tak hi hman a nih thu report benglut tak tak dawn a ni.

Lengpui Airport Chaplain : Mizoram sorkar-

Ngaihtuah tur : "Inthawi nan a mitdel in hlanin sualna a awm hek lo maw?"

in kan dilna te ngai pawimawha Lengpui Airport a tanpui ngai te lo tanpui a, tawngtai a thlahliam ngai te lo thlah tur te, counseling ngai te lo tanpui tur leh, vanduai thu a ruang rawn phurh hawn te lo dawngsawng a lo tanpui turin Chaplain dah min phalsak ta a. He thil thar rawngbawlina hlu tak atana duhsakna min petu Chief Minister zahawm tak Pu Lalthanhawla chungah lawmthu kan sawi a. Chaplain hmasaber atan Major C. Thanhanga dah a niin 16th May, 2011 khan Airport ah office te neiin a hna thar hi a zawm ta a ni. Sipai ten amah leh a hna atan hian i tawngtaipui fo ang u.

Sport : Central South Division chuan an division pum a SAY te tan Football leh Volleyball ah Tournament buatsaihin section 8 ah an inthen a, chuta section tina champion te chuan Division Champion nihna inchuhin Aizawl AR Ground ah ni 26 & 27 May, 2011 khan Final Days an hmang a, he hun ropui tak hi Lt. Colonel Lalramhluna, Chief Secretary in hawngin a hmanpui.

Territorial Cabinet System : He kalphung thar hi khawvel ramdanga territory te chuan kum tam tak an lo kalpui tawh a, South Asia-a chuan kan International Secretary leh COIL hmalakna in May 2011 atanga hman tur a tih chu Central Sorkar pawhin min lo remtihpui tawh bawk avangin India Eastern Territory pawhin 28th May, 2011 atang khan alo hmang ve tan ta a. Cabinet System Administration hi Aizawl Temple Corps ah mi sawmbik te nen ropui taka lawmna leh hlanna Colonel Lalngaihawmi, Territorial Commander in a nei. India Eastern Territory-a Cabinet Secretary atan a ruat te :

- 1) Major Thanhlira, Secretary for Personnel
- 2) Major Khaizadinga, Secretary for Programme
- 3) Mr. Joseph Lalrintluanga, Director for Business Administration

An ni pathum hian IHQ administration remruatna angin Territory-a department te chan insemin an vil dawn a ni.

- Lt.Colonel Lalramhluna
Chief Secretary

NAWHCHIZUAR PIANGTHAR



- Commr. Lalthanngura (R)
Tuikual 'B'

Luka 7:36-50

Isua Krista chu leiah a lokala, a thu sawi lai miin an ngaithla duh em em mai a. Bible chuan hetiang hian min hrilh a. Tin, chhiahkhawntute leh misualte zawng zawngin a thu hre turin a kiang an rawn pan a. (Luka 15:1) Baptistu Johana chu a lokal a, chhang a ei lova, uaiin pawh a in lova, nang nin, Ramhuai a zawl a nih hi, in tia. Mihring fapa a lokal a, a eiin a in a, En teh u, chaw heh mi, Uaiin heh mi, chhiahkhawntute leh misualte thian saw! In ti si a.

He lai Luka zia 7:36-50 ah hian Isua chu Pharisai simonan chaweiah a awm a, hetihruah hian, hmeichhe pakhat, Nawhchizuar, a hming sawi a ni lova, mahsela, a nun ning tawh em em, sim tawh hnu hi Isua bulah a lo awm ve reng mai ani. He nu, a hming sawilan loh hi, The living Bible ah chuan, Hmeichhia kawthlora inzuar, tiin a sawi a. (A women of the streets a prostitute) tiin The Living Bible chuan min hrilh ani.

Nawhchizuar hi kan Bible chuan Genesis atangin Thupuan 17:1-18 thlengin hmun a awh tir a, churangin Pathianin Isua Kristaah hian Misual simte an hlut zia leh Pathianin a lo lawm nasat zia entir nan kan Bible ah hian hmun pawimawh tak a lo luah tir reng ani tih hi kan hriat reng a ngai a, hetih rual vek hian kan nunna ah sual sim tur pawh kan neih ve zia kan hre chhuak thei ngei ang le!. Khawvela kan la awm chung hian mihring rilru ah hian sual a lo lut fo tih hria in simna kan mamawh hle bawh tih pawh I hre tel bawh ang u.

1. **Dinaii** : Jacoba fanu, Canan rama nulata hmu turin khawlai ava leng chhuaka, Hamora fapa, Sekema chuan a lo hmu a, a mana, a mutpuia, a tlawm ta a. Jacoba fate chu an thinur ta a, an ni chuan kan farnu hi Nawhchizuar tih angin a ti tur em ni ang, an ti ta hial mai

a ni. (Genesis 34:1-31) Nawhchizuar lo awm tanna hi engtik lai khan nge a lo awm tih hre theilo mahila, a rei tawh hle ani tih chu kan hre thei ang.

2. **Tamari, Judaa monu** (Genesis 38:1-26) : He Tamari hi a tirah chuam Nawchizuar ani tih pawh kan hre lova, pasal sun ani a, chu a pasal chu a sun chuan khawhar takin Enaim khaw kulh kawngkhar bulah hmai khuhna in a inkhuha, a thu a, Nawhchizuar emaw a ti a, mahsela khua mipuite chuan, Nawhchizuar reng reng hetah a awm tawh lo, tiin vawihnih ngawt in an chhang a, Nawhchizuar an awm tawh lo thu chu chiang takin khua mite chuan an hrilh ta ani. Chuti chung chuan Juda chuan, "Hawh, khawngaihtakin i mudun ang", a ti a, an mudun ta a. Tin, reilote hnuah chuan a rai ta a, nau apai ta a. I monu Tamari chuan tlangval a ngai a, chu lo pawh chu, ngaiteh, sawn a pai nghe nghe a sin, tiin an hrilh ta hial a ni.

Pathian chuan Nawhchizawrhna sual hi chu pawh a tiin a rilru pawh a hrehawm ngei ang le. Van atanga rawn thlirtu Lalpa Pathian chu mihring te a lo siam tak avangin a inchhir ta hial ani. (Genesis 6:6)

3. **Samsona Pathian - Nazarit mi chu** : Pathian mi, Nazarit tih lai han ni te pawh hi tisa chakna hian a hip nasa em em thin a, Samsona pawh hi Saza khuaah a zu kala, chu khuaah chuan Nawhchizuar hi a zu hmu a, a tisa chakna chu a in sum zawh tak loh avangin Nawhchizuar chu a hmuh chuan a pawl ta ani. A mak thin ngawt mai ti rawh u maw. Israel fate kum 40 lai mai Phillistia kutah an awm a, chumi chhan chhuak tur chuan Samsona hi Pathian in a hmang a, mahsela ani Samsona pawh hi a rilru chu Nawhchizuar ah hian beithlawp a, a pawl ta mai niin a lang ani. Kan Bible chuan, Nawhchizuar

te, Uaiin te, Uaiin tharte chuan thinlung a la bo thin a tih ang main Samsona thinlung pawh chu he Nawhchizuar hian a lo lak bo sak der hman mai le. (Hosea 4:11)

4. **Rahabi - Nawhchizuar :** Canan ram enthlatura kal hote, Johsua leh Kaleba te kha Rahabi, Nawhchizuarin a in ah thukru in a lo humhim ve tlat thung lawi si le. Heng avangte hian kan Bible hi ngun taka kan en chuan Pathian hian a mite chhandam tur hian misualte pawh hi a lo hmang ve thin tih ka han hre thei leh zel ani. (Joshua 2:1-24)

5. **Nawhchizawrh hi Pathian huat zawng ani:** He sualna rilru pu hi an tam tial tial a, Maicham-Nawhchizuar an lo awm ta zel a, inbiak puanin kawngka bula rawngbawltu hmeichhia te an lo mutpui thin thu te chu Puithiam Elia chuan a lo hria a ni. (Samuela 2:22) Tin, Zawlnei Hosea hun lai pawhin Maicham-Nawhchizuar nenen an inthawi ho si a, (Hosea 4:14) Ephraim ho pawhin Nawhchizawrh an chinga (Zawlnei Hosea 5:3) Zawlnei Joela hunlai te pawh khan, Naupang chu a hmei a pa in, Nawhchizuar leh Uaiin lei nan an hralh a (Joela 3:3) Israel te sualna chu a rapthlak hle mai, Pathian pawhin a hmangaih zo lovang a hlauhawm hial ta ani. Pathian chuan in Nawhchizawrhna chu an tuar ang, ati ta hmak mai ani (Numbers 14:33) an simna turin silhfen puan a siam tir a, an silhfen hmawrah chuan a dum pawl dah turin a ti a, chu an puan hmawr dum pawl chu an en a piangin an Nawhchizawrhna rilru chu an theihngilh tawh ang. Lalpa Pathian chuan tiin a sawi ani (Numbers 15:37) Pathian in Israel te chuan lo uire san tawh mahsela ala hmangaih reng ani tih entir nan zawlnei Hosea hnenah chuan, kal la, nupuih Nawhchizuar neila, Nawhchizuar lakah fa hring rawh, ti thu hi Pathian in a hrilh a ni.

6. **Pathian mi, Puithiam te tan chuan Nawhchizuar neih khap ani ta (Leviticus 21:7) :** Hmeichhia Nawhchizuar emaw, hming hliau emaw, a pasal mak hnu emaw an nei tur ani lo, an Pathian tan mi thianghlim an ni tur ani, tiin a sawi ani. Hei chauh hi ani lova, Israel mite tan chuan Nawhchizawrh hi Pathian in a khap ta tlat ani. Israel fanute zingah nawhchizuar an awm tur ani lova, Israel fate zingah mipa inzuar emaw, uicho emaw thutiam nan Lalpa in Pathian inah in keng tur ani lo. A engve ve pawh chu Lalpa in Pathian ngaihin

thil tenawm ani (Deuteronomy 23:17-18).

7. **Isua Krista rawngbawl dan:** Kan sawi tak angina fapa tlanbo u zawk pawh khan a nau tlanbo, i fapa, Nawhchizuar hnenah i sum ei ral vektu hi a lo haw veleh ama tan sebawng no thau tak kha i lo talhsak vei a, a ti hial anih kha (Luka 15:30) He mi bakah pawh hian Isua chu chhiahkhawntute leh misualte zawng zawngin a thu hre turin a kiang an rawn pan a (Luka 15:1) tih kan hmu a, lekhaziaktute leh Pahrissaiten hmeichhe pakhat a uire lai an mana, Isua hnenah thiam loh changa a awm ngei an beiseia mahsela, thiam a chang ta zawk a, kal la, tun hnuah ti sual leh tawh suh a ti mai a, thiam changin a chhuak ta ngei anih kha (Johana 8:1-11) Mihring fapa hi rawngbawl tur leh mi tam tak tana a nunna hlan turin a lokal ani tih chu a dik zel ani.

8. **Nawhchizuar :** Isuan a hmangaih (Luka 7:36-50, Matt 21:31-32) chhiahkhawntute leh Nawhchizuar chuan Pathian ramah an luh khalh dawn che u anih hi, Isuan ati. Johana chu felna kawngah chuan in hnenah a lo kal a, amah chu inring silova, chhiahkhawntute leh Nawchizuar erawh chuan amah chu an ring a, nangnin chu chu in hmuh hnu pawhin amah chu in rin theih nan in inlamlet chuang si lova, (Matt 21:31-312) Hmeichhe sual pakhat, (a women of the streets, a prostitute) hi Pharisai, Simona In ah Isuan chaw a ei tih a hriat ve leh Alabasta bawmin hriak rimtui a rawn keng a, a hnungah a kephah bulah chuan tap chungin a dinga, a mittui in a kephah a lo far huh a, a sam in a hru a, a kephah chu a fawp ngawih ngawih a, a hriak rimtui chuan a chulh a. Fapa chu fawp rawh u tih (Bible Sam 3:12) na a inziakte hi a lo hreve pawh a ni mahna he misual nu hian le!

Isuan, hmeichhe hnenah chuan, i rinna hi chhandam i nih phah ani, Thlamuangtakin kal rawh a ti ta ani. Kei ka rin dan chuan he misual nu hi a zai ngei anga, Amah ka pan, lawman ka hmu, ka thlarau pawh a chhandam, vanah ka tan hmun buatsaihah chuan, chatuanin ka chawl anga, tih hla Lt.Col.Kawlkhuma hla phuah hi a sa hialin ka ring a ni.

9. **Willian Bootha chanchin tha hrilhdan Bible ah (Roreltute 11:1-3) thu kan chhiar chuan Jephtha chu nawhchizuar fapa ani a, a unau ten, nang zawng kan pa in ro i luah thei lovang hmeichhe dang fa i ni sia, an ti a,**

an hnawt chhuak a. Riangvai leh retheite chu chhungpui fate chuan, Nawchizuar fa leh nghal si chu roluah tu pawhin an duhlo.

William Booth-a chuan heng misualte hnenah hian Pathian ram thu, chhandamna thu a sawi a, London khawpui kawthler Soho area hmunah te nawhchizuar ten Pathian an lo hriata, chhandamna an lo neih ve na turin theih tawpin Pathian thu a sawi thin tih kan hria ani. Vawi khat pawh a thu sawi ngaihthlak na a piangthar, Nawhchizuar piangthar hnenah chuan heti hian thu a sawi a. Ka fanu, van I thlen hunah chuan hmun nuam tak i chang ngei ang chawimawina hmun chu, Mari, Magdalini chuan (seat) thutna hmun tha ber a lo pe ang che tiin, William Booth-a vuina hmun Olympia mi 40000 an telna hmunah pawh khan he hmeichhe nu, nawchizuar piangthar pawh hi a kal ve a, a bula Lalnu thu chuan, engtiang anga lokal ve mai nge inih tia a han zawh chuan, keini ang misual hi min khawngaih em ani tiin a chhang ani.

Mizoram a Chhandamna Sipai Pawl te hian a tlem berah Misual Nawhchizuar (K.S) kan tih angte hi kumkhatah 5 tal chhandam turin i thawk ang u, Hawh u kal chhuak ila, I chhandam teh ang u. He hmeichhe sual tih khawpa awm tawh hnu, Bible Living Bible ah pawh kan hmuh danin, A Woman of the streets, a prostitute tih lai ni thin kha, kan Lal Isuan a ngaidam ta hlauh a, a sual tam tak kha ngaihdam in a awm ta tih leh I sualte

ngaihdam ani ta, Isuan a han ti mai chu a thawhuai ngei ang le.

He hmeichhia chauh hi ani lo misual min an tih thin hi, Paula pawh an zing a misual ber ka nih hi ti hial khawp a sual ani. Mahsela heti hian a sawi a. Isua Krista misualte chhandam turin khawvelah hian a lo kal tih hi a rinawm in a pawm tlak em em ani. An zinga misual ber ka nih hi a ti hial ani. (Timothea 1:15)

Khawvelah hian misual ber mai ka nih hi ti khawpa awm te pawh Isuan a chhandam duh vek ani. Pathian chuan a fapa Isua Krista chu mite chhandam turin khawvelah a tir a, fapa a hring anga, a hmingah Isua i sa tur ani. A ni chuan a mite an thil tihsual lakah a chhandam dawn si, ati. (Matthaia 1:21)

Kumin 2011 kumah hian mi dangte chhandam tur a thawh chhuah hi I uar ang u.

William Booth-a chuan 1895 kumah khan beihruah a siam a, a thupui ah chuan midangte (others) tih hi a siam a, an beihruah chuan khawvel pum pui hi a tuam ta a, "All the World" chanchin bu te pawh a lo chhuah phah ta hial a ni. Midangte, chhandam ngai takte hi chhandam turin i thawk chhuak ve ang. Isua pawhin a rawngbawlnaah khan mi sual tin rengin an pan a, a lo chhandam zel bawk ani. Lalpa tana thawh chhuah hi a va hun ta ve le. Hawh u, i thawk chhuak ang u.

I DIN LEH ANG U - 2011 THUPUI HI

Nehemia 2:1-20 hi chhiartu zawng zawng ten chhiar hmasa thei ila ka ve ti em.

He kan thupui hi Daniala Hapta 70 bul intanna a ni a, BC 454 niin a hriat a ni. Chuvangin kan thupui

lo irhchhuah na dan hi, thubul lam atangin ilo zir hmasa teh ang.

BC 951 Israel te chu ram pahnih ah inthenin, Israel te chu Palestina hmarlam ah hman sawm te chu Lal hrang neiin an awm a. Juda



- Major Sangzuala
Bazar Corps, Aizawl

te chu chhimlam ah Lal hrang neiin an awm ta bawk a.

Israel ram chu, BC 721 ah Austria Lal Sargon- a chuan a han run a, Puithiam te, Lal te leh Mitha zawng zawng, sal atan a hruai vek a, Pathian Thuthlung an zawm duhloh avangin, Israel ram chu a KIN ta a.

Juda ram pawh, BC 588 ah Nebukanezara'n a han run a, Lal leh Puithiam leh zawlnei leh mitha zawng zawng sal atan hruai vekin, Jerusalem Temple rawkin, rangkachak no te tichhiain, a then Babulon lam ah a hawn a. Juda ram chu, Pathian Thuthlung an sawm loh a vangin a KIN ta a.

Zawlnei Daniala chuan, an "Messia" tana, Jerusalem ah kir leha tungding leh Sa tha leh turin tawngtaina pindan a siama, Jerusalem lam tukverh hawngin a tawngtai thin a. (A ni hi Babulon saltang a ni)

Tichuan Babulon chu tlawmin, Persia sawrkar chu an hunlaia khawvel zawng zawng roreltu an lo ni a. An Lal Arazerzia lal kum 20-na an tawngtaina chhanna chu, Pathianin Gabriela tirin, chaktaka rawn thlawkthla in Daniala hnen ah a rawn hriattir a. Chu hlawhtlinna thu Jerusalem tungding leh sa tha tur chuan, Nehemia hnen ah Lal thupek chu a lo thleng ta a. Lal chuan saltangho kir phalna leh, Sipai sakawr chung chuang mi ho khat leh Palestina ram ngaw (ramhak) a mi lak phalna leh, a tul chuan Lal Sum pawh hmang zel tura thupek kengin, Nehemia chu Jerusalem ah a kal ta a ni. Bc 454 vel nia hriat a ni.

Hemi hun hi Daniala hapta 70 bultanna chiah pawh a ni a. (Daniala hapta hi Chiang zawka kan hriat a tul a, Abu in siam mek a ni)

Nehemia chu Jerusalem a thlen hnu nithum zana chuan Sa chauh lo chu engmah keng lovin, hnathawh dantur a en chhuak veka, Roreltu te leh midang tumahin khawi ah nge a kal an hre lo. Chumi hnuah chuan Judate,

Puithiamte, roreltu leh midangte hnenah chuan, "kan chan a chhiat zia hi in hmu a, Jerusalem a ram tihte a kawngka te a kang tih te pawh in hria a, hawh u sawichhiat kan nih tawhloh nan, Jerusalem kulh chu 'IDIN LEH ANG U'" a ti a.....tichuan anni chuan, "Tho ang u khai: i din leh tak ang u" an tia. Chuti chuan hnatha thawkturin an kut an ti chaka. (Nehemia 2:17,18). Heng thu kan en hian Israel/ Juda te an SALTAN kum 70 na niin a lang bawk.

Kan kum 2011 thupui hian hetiang hian zirlai min pe a ni.

1. Hotu (Leader) Territorial Commander, Divisional Commander te leh Corps Officer te chuan mipui laymen te hma ah Nehemia ang khan an feh chhuak ang a. Hmalakna tur tinreng ah, anmahni mai chuan tihvek theih loh a nih zia hriain, Local Officers, Corps Council te leh Department hruaitu te leh Sipai (laymen) te nen, lungrual taka thawk ho turin hma anla tur a ni.
2. Local Officers leh Department hruaitu te pawhin, Thlarau a khat a thawhho a tulzia an hriat a tul ang.
3. Sipai (Laymen) te pawhin "I thovang u khai I DIN LEH ANG U" tiin kan kut leh ke i ti chak ang u.
4. Kei mahni mimal tin hian kan Pathian tan intuai thar leh ila, mi tupawh thawhpui thei turin, Pathian hnen ah chakna dilin THILPEK THUAH TE inkhawm na kal tur te, kawng tinreng ah hmasawn turin tan ila ang u.

"Thupek thar ka pek che u hi, in hmangaih ula. Keiin ka hmangaih ang che u hian, nangni pawh in hmangaih ula. In in hmangaih chuan, mi zawng zawng in, ka zirtirte inni tih chumi ah chuan, an hre thei ang" tiin Isuan min hrilh. (Johana 13:34,35)



PATHIANTHU CHHAWR RAWH

Mizote hian Pathianthu hi duh viauin kan lang a, mahse kan chhawr vak lo. Urhsun takin Pathian thu hi, a sakhua zawngin kan la a. A chhunga thu tha tak takte, tarmawi atan kan hmang a, a tha e. Thu ringawt chuan kan zir chipchiar tawh bawka kan hre hle mai. Hriat aiin hman a tha zawk. Kan sawi nasain kan sawi thiam hlawm hle mai. Sawi aiin hman nghal a tha zawk. Pathian thu pawh kan ring hlein a lang. Rin aiin chetpui a tha zawk. Heti khawpa Pathian thu duh hnam, inkhawm tamte hian, Pathian thu kan chhawr si lohzia hi a mak hle a ni. Hnam awmhlei, hlemhletna a khat, hnam hrisel lo leh Cancer vei tam ber kan nih hian, Pathian thu kan chhawr lohzia a puang chhuak a ni lawm ni?

HRIAT AIIN HMAN : Pathian thu hriatna lamah hian kan sang tawh khawp mai. A bu chhung thu leh History te pawh kan zir bel tawh hle in a lang. Bible zirna lam degree sang tak tak nei Mizo zingah pawh kan nghah ta. Pathianni apianga Sunday Sikul-a kum tuana kan zir thin leh, inkhawm danga kan Pathian thu ngaihthlak atang tein kan hre tam tawh a ni. Kan rawngbawltu (Minister) leh kan Evangelist te thusawi atangte hian, Pathian thu chu kan khehin kan lipse nasa tawh khawp mai. Mahse kan nunah te kan khawsaknaah te a lang si lo.

Kan Pathian thu hriatte hi kan chhawr lova, kan thatpui lova, kan hmemhnanpui nasa lo hle a ni. Pathian thu hi kan thatpui a kan chhawr ngei tur a ni si a. “hriatna mai chuan a tihlum thin” tih ang lek dinhmunah kan ding em ni? Bill Gates-a hausakzia hriain sermon vak mah ila, kan hman phak si loh chuan kan chhawr miah lo. Kan Pathian thu hriatte hi kan hman nghal a, kan thatpui nghal tura Pathian min pek a ni. Van thlen hun atan chauh a ni lo, tun atanga hman nghal a, van thlenga chhawr tur a ni zawk. Hriat aiin hman a tangkai zawk. Pathian fapa Kristaa min tihsak leh, kan chanvo min pekte hi hre ringawt lovin a taka hman nghal tur a lo ni e.

SAWIAIN TIH : Pathian thu hi kan sawi tam ta, kan zir tam ta. Pulpit tlangah mawi leh tha takin



- PC Lianhmingthanga
Aizawl Temple Corps

ngaihnaawm takin kan sawi thin, a tha e. Chhandamna thute, Rinna thute, Thianghlimna thute kan sawi thin. Sawi lamah na na na chuan kan sawifiahin kan sawi thiam hlawm hle mai. Sawi lamah hian kan piangthar a, sawi thei a pui kan tam. Sawi lam hi kan addict ta emaw tih khawp te pawhin kan sawi nasa a ni. Sawi tur ngah leh insum thei lo pawh kan tam. Kan sawi vak a, kan thaw huai a, kan lung a awi a, hlawhtlingah kan inngai thin. Sawi aiin tih a tha zawk. Sawi aiin nunpui a hman nghal a tha zawk.

Hmeichhe pakhat chu a lam a lam thin a, thusawi lo chuan a awm thiam thin lova. Thu tha deuh a sawi a, mahse pasal thar hi a nei reng mai. A sawi chu thiltih lamin a zui lova, a ka in a sawi vak a, a taksain a nunpui lova, a tih erawh chu a dang daih thung a ni. Kan sawi nasa tawh a tih lamin i nunpui tawh zawk ang u. “Tlai tak leh puar takin awm rawh u” ti ringawt la, chaw ei tur i pek si loh chuan a tlai chuang lovang. Pathian thu kan sawi vak vak hi thiltih a tel loh chuang engmah a ni love (Jak 2:15-17). Sawi aiin tih lam uar zawk tawh ila, Thlarau lamah a takin kan thanglian dawn a ni. Pathian thu kan hriat, kan sawite hi a takin zawm ila, ti nghal ila, Pathian ropuina kan hmu dawn a ni.

RINNAAIIN CHETPUI : Mizote zingah hian “Rinna” kan tih thin hi Tirhkoh Jakoba sawi thiltih tello rinna ang kha a ni thei mai awm mang e. Leilawn chuan a dawl ngei ang che tih i ring a ni awm e, mahse i zawh ngam si loh chuan awmzia a neilo. Rinna aiin chetpui a pawimawh zawk a ni. Pathian thu i hriat, dik nia i rin kha i chetpui (act) loh chuan i chhawr thei chuang lo. Chetpui han tih hian, Rinna a rap ngam, dinpui ngam tihna a ni.

Israel faten Joshua ho khan Pathian thu an rinna chu an chetpui tih kan hria. Jordan lui, a kuang khat mar pung mai chu kan turin, Lalpa thuin an inbuatsaih a. Puithiam Bawm zawntute an in ralring a, an hnung lam tawng sanghnihah mipuite an ding bawk. Pathian thu an rin leh an pawm chu an chetpui a, Puithiam tlar hmasa a miten an ke a Jordan tui an rah chiah khan, thilmak a lo thleng ta a ni. Tui chu a inzial tup tup a, Adam khaw bulah, lui hnar lamah chuan a ding ta ur mai a ni. Lei charah Jordan lui chu an kal kai ta a ni (Joshua 3:16). Rinna chu chetpui tur a ni. Rinna chu chetna (thiltih) a lanchhuahtir a nih chauhin Pathian ropuina thilmak a lo thleng thin a ni. Pathianin Joshua hnenah, "In rah chin apiang in ram atan ka pe ang che u," tia a sawi ang khan, Rinna kan chetpui (ke kan nghah) chin zel kha ram atan Lalpan min pe a ni, Ka ring ti a tha mai lovin, chetpui tur a ni, Kan chetpui chuan kan rin Lalpa kha thiltihtheihna nen a lo che ta thin a ni.

Pathian thu hi tun atangin khawvela kan la cham chung ngei hian chhawr nghal tur a ni. Kan thlarau kan rilru leh kan taksa hian a chhawr nghal ngei ngei tur a ni. Leia kan chhawr loh chuan Vanah kan chhawr ngut lovang. Leia kan chhawr si loh chuan Van (pa hnen) hi kan thleng ngut pawhin a rinawm loh a ni. Hriat ringawt aiin Pathian thu hi hman a tha. ramhuai hnawhchhuah nan, tihduhdah tuarte chhanchhuah nan hman tur a ni. Sawi ringawt aiin Pathian thu hi a tih a nunpui a tha zawk. Ka ring tih ringawt aiin chetpui a hlawk zawk. Pathian thu hi kan thlarauvin a chhawr ang a, a thlamuanpui tur a ni. Kan rilru leh taksa damna leh hriselna atan pawh chhawr tur a ni. Kan chhawr theihna turin Pathian thu kan hriatte hi hman nghal a, tihngal a chetpui nghal tur a ni. Rinna a kan dinna zelah, ke kan nghahna zelah Lalpa a lo che mai thin dawn a ni. Ringtute hian Pathian thu hi hmangin i chhawr ang u.

TIHDIKNA

Sipai Tlangau May 2011 chhuakah khan tihsual palh a awm a, a tihdikna hetiang hi a ni e.

Pu Chalkhuma chanchin ziahna phek 13-na ah Pi Lalthangi tih kha Pi Laithangi tih zawk tur a ni a, tin, Pu Chalchhuna fanu tih pawh kha farnu tih tur a ni. Pi Biaki tia ziah na apiang khan Pi Buki tih tur a ni bawk. Pu Chalchhuna tup tih kha tupa tih tur a ni bawk

Sipai Tlangau June 2011 chhuakah khan tihsual palh a awm a, a tihdikna hetiang hi a ni e.

Phek 14-na ah Dar pe tih ah khan Pu Vawra te chungkua tih aiah Pu J. Malsawma te chungkua Chawnpui Corps tih zawk tur a ni e.

Tihsual palhah min lo hrethiam dawn nia.

- Editor

Sipai Tlangau June 2011 chhuaka Sunde Sikul Bultana Dan phek 11-naah khan tihsual palh a awm a, Sl. No. 5,6,7-te a Sunde Sikul zirilaibu ziaktu Brig. Ngurliana tih kha ka tihsual palh a ni a, Brig. Sapliana tih zawk tur a ni e. Chhiartute hriatthiamna ka ngen e.

- Lt. Col. Lalramliana

MAHNI HUN THEUHA THAWHLEHNA

- *Roluahzova, C.S*
Kawrthah Corps

I Korinth 15:20-23-ah chuan, ‘Nimahsela Krista chu mitthi zing ata kaihthawhin a awm takzet a ni, muhilte thawhhma hruaitu a lo ni ta.’ Nimahsela mahni hun theuh zelah Krista chu thawhhma hruaitu a ni a.

Thawhlehna hun hi Bible-ah hian kan hmu a, mi tam tak rin dan a ni lo a ni. Pastor pakhat chuan, ‘Thawhlehna hi hun tam takah a then a, kei chuan Bible-ah hian ka hmu ve lova,’ a ti a. Thiamloh chang te thawhlehna leh thiamchangte thawh lehna, tiin sermon a sawi a. Kan thurina **RORELPUI** a tih ang hian mi zawng zawng a huhova awm khawm a, thiam changte vanram lama kal a, thiam loh changte hremhmun lamah liamthlak duak tura ngaihna, rorelna lo awm tura ngaihna hi mi tam takte rin dan a ni, nimahsela Bible hian a lo thliar thlap mai a ni. I lo zir tlang teh ang. Kan Bible hian thawhlehna hi hun lo ah a lo then thlap mai a, hetiang hian :

Hun khatna : Matthaia 27:52-ah, Thlante a lo inhawng a, mithianghlim muhil tawhte taksa tam tak pawh kaihthawhin an awm ta a, chungte chu a thawhleh hunah chuan thlana lo chhuakin khaw thianghlimah chuan an lut a, mi tam tak hnenah an inlar ta a, a ti a ni. Adama atanga Isua Krista thihna a thawhleh inkar a muhil (thi) ta te chu, an thawhleh thu kan hmu a ni.

Hun hnihna : Isua Krista thawhlehna atanga tun thlenga Krista-a muhil (thi) te chu I Thessalonika 4:13-17 kan chhiar chuan Krista-a muhil tawhte chu Pathianin am rualin a rawn hruai ve bawk ang, a ti a. Chang 16-ah chuan Krista-a thi tawhte chu an tho hmasa ang a, a ti a ni. Hei hi thawhlehna hun, hun hnihna chu a ni.

Hun thumna : Thupuan 20:4 - ‘Hun lawmawm Chhandamna Ni’ Thlarau Thianghlim hun tuna kan hman mek hi a liam ang a, Krista’n Kohhran ho a lak chhoh

hnuah Khawvelah hian hrehawmna hun a lo intan ang a, hetah hian chhelna leh huaisenna a nun chhanhimna hun a lo awm leh ang; he hunah hian Nun chhanhimna changtute chu Thupuan 20:4-ah hian an chanchin hetiang hian kan hmu a ni.

Tin, Isua hriattirna thu avang leh Pathian thu avanga lu tante Thlarau leh sakawlh leh a lem chibai buk lova an chalah emaw, an kutah emaw chhinchhiahna nei lote Thlarau chu ka hmu bawk a, chungho chu an lo nung a, a ti a ni. Hei hi Thawhlehna hun thumna chu a ni.

Hun lina : Thupuan 20:13-15 - Thupuan 20:5-ah hian Krista avanga tuartute an lo nun (thawhleh) khan mitthi dangte erawh chu kum sangkhat a vei (a ral) hma loh chuan an tho leh lova, he mite hi Lal Isua ring lotu, Adama atanga thi te zawng zawng thlarau thiamloh changa thi ta te an ni. Lalthutthleng vara rorel hun hian an lo tho ve dawn a ni.

a) **Thawhlehna hmasa :** Thupuan 20:6-ah chuan thawhlehna hmasa bera telte chu an engthawlin an thianghlim a ni, a ti. Thawhlehna hmasa a tih hi Pathian lalfa, Piangthar te, Lal chhungkua, Krista Sipai hote chu an ni.

b) **Thawhlehna hnuhnung :** Thawhlehna hnuhnunga tho leh te chu thiamloh changa tho leh turte, Pathian ringlo Lal Isua tlanna engahmaha ngai lotute an ni (Thupuan 20:11-14 hi chhiar teh).

Dopui duhtak te u, khawiah hian nge i thawhleh ve dawn? thawhlehna hmasa ah nge thawhlehna hnuhnung berah hian i in enchiang ang u.

Chhiartu duhtakte, Lalpan thawhlehna hmasa a tho leh tur hian mal min sawm theuh rawh se.

A KAL ZEL E, HMA A SAWN ZEL

*- Major Saitluanga
i/c Officer*

Salvation Army rawngbawlna hi “Huapo rawngbawlna” tiin sawi ta ila, a e hrim hrim tan lo chuan beng tithleptu a nih ka ring lem lo. Mahni mihringpuite tana tisa leh thlarau malsawmna tura kawng hrang hranga a thawh thinna hian chu chu chiang takin a tarlang a ni.

Hetieng taka naupang rawngbawlna ngaipawimawhtu kohhran hian, thalaite a ngaihthahin an tui zawng leh duhzawng a mausam chuang hauh lova, hmun pawimawh a chantir reng zawk. Tar leh upate lah a namnulin a palzut na hek lo. Chutih a hnekin Over sixty club hial a nei zawk si a. Bible duh dan ang ngeiin, mahni mihringpuite laka bihrukloh hi a zia dik tak, a pianken ropui tak a la ni reng. Chutihrualin, Sipai mimal nun erawh inenfiah fo thin chu a tullo bik hauh lovang le.

Engpawhnise, tun tumah hian thil ropui leh inthup, nidanga kan la hriat ngai loh leh kan Territory-a thil thar, Sipai thahnemngaite leh kan hotute hmanga Lalpa min pek, ‘Tar chaklo leh baihvai zawkte enkawlina hmun’ lam hawiin kan puanzar i han thing pharh dawn teh ang.

Engtinng a hming kan lam ang? : Sipai pawl nu, ngilnei leh nun tlawm, a kotu Lalpa tan erawh Nu rorum leh chhel tak si, Catherine Booth-i hming chawiin, “Catherine Booth Home for Aged (Beiseina In)” tiin. A hming koh thuah kan leili a kham a, kan dang a lo awk hman deuh a nih pawhin, ‘C.B Home’ tiin emaw, ‘Beiseina In’ tiin emaw sawi ta mai pawh ni ila tuman thiamloh an chantir hauh lawng che.

Khawi hmunah nge? : Mizoram hmun laili, India ram pum huapa ziak leh chhiar thiam tamna ber District, HSLC leh HSSLC Exam 2010 a pakhatna nei ngat, Serchhip khwpui huam chung New Serchhip Vengnuam a awm a ni. Aizawl atanga motor-a i kal chuan darkar 5 chhungin nuamsa takin i thleng thei ang.

Kawngpui hulum lutukin a chimbuai phak loh, khawharthlak khawpa fianrial ni bawk si lo, hmun

thengthaw leh tar tan pawha thlannahawm tak a ni. Midland Division thiah a nih hmaa DHQ tura Major Hrangngura D.C enkawlina hnuaia sak a ni a, RCC building chhawng hnih, Serchhip khawpuih pawh zahpuiawm lo leh langsar tak niin, khawpui cheimawitu pakhat a tling ve zan mai. Major Hrangngura chu tunah kan zingah a awm ve ta lo. He building hi amah hriatrengna lungphun angah pawh ngaihsak hial ta ila a sual lutuk bik lem awm love.

Engtikahnge an hawn? : Kan hotuten ruahmanna fel tak siamin, kum 2010 Sahmulphah thla ni 24 khan, khatihlaia Territorial Commander Colonel Samuel Charan khan Pathian hnena hlan chungin ropui takin a hawng ta a nih kha. A hawn ni khan THQ Staff thenkhat leh Central South Division Leader-te bakah, Serchhip Sipaiten neitu chan an chang thiam takzet. Media hrang hrang lah an tihur theuh tiin an tul tlang hle. Chu mai a la ni lo, Aizawl lam atangin zaithiamte bakah Chaltlang Corps SAY member engemawzat lokal in he hun oawimawh tak hlutna tizual tur hian sum tam tak sengin an theihnate an rawn hlan bawk. Thil thar a ni a, boruakin a zir bawk nen, a va h limawm em khami ni kha!

Home-ah chuan tute nge awm ang? : Ele a mamawhtu takte an awm ang. Mipa emaw, hmeichhia emaw pawh ni se, kum 60 chin chunglam an nih a, an mamawha an awm duh a nih chuan tu tan pawh awm theih a ni. Inkaihhruaina danin a phut angte palzut si lovin. Chitin hnamtin an leng a, belh tur leh inngahna tur dang nei lo ten Pathian thlamuanna, taksa, rilru leh Thlarauva an chan theihna turin.

Chumi hmun ngeiah chuan tunah hian chi bik, kohhran leh sakhua inthliarna awm hlek lovin, an khualzin kawng tawp lam zawh mek pa pasarih ten hlim leh lawm takin an hringnun chu an dinthar mek asin. An hlim a, an lungawi a, an thla a muang hliah hliah. Hei hi eng dang vang ni lovin, Beiseina In-a an awm vang ka ti ngam sak mai.

Reports :

Miin engtinngge an ngaih? : Rawngbawlina kawnga ' tih awm tak ti thin' chu Salvation Army te an ni tih hi mite ngaihdaan a la ni reng. Chu chu he Home hian a takin a lantir. Kan Society-ah la tul rihlo a hriatna awm bawkw mahse mamawhtu an awm tho si. Home lian tak neih hi a ropui lai ber erawh a ni hranpa lo. Chu ai chuan, mamawhtute mamawhna phuhruk tura kawng hawngtu nih hi a ropui lai tak chu a ni zawk ngei ang. Mamawh awmnaa awm thin Sipai Pawl hi a chhuanawm a, chu chu mite pawhin an ngaihsan loh theih lohna lai a ni reng a ni.

Tar Home a tar lo : Mihringte hi vanglai nei kan ni a, vanglai hun pawh chuan chuai ni a nei thin. Kan dam reng a nih chuan Tar hmabak vek kan ni. Vanglai hun pawha mi tak zawkin kan tihtheih hauh loh chu Beiseina In ah hian a thleng tlat mai. Pu C. Sawichhunga kum 71 mi chuan kut lawng ngatin Mute a man asin! Amah lah a hlim narawh, a dinhmun thlirin Sakei kap aiin a nep chuang bik dawn em ni? Ropui ve tak a ni.

Biak In rawngbawlina lamah ni se New Serchhip Corps tan malsawmna an la ni ve tlat. Khuang rik ruala lamtuala zuanglut nghal thei, Khawmual kaikuang chhaih kawlh ang harh harha Pu Kumara a rawn phar chhuah a; Arla ruah do ang zata Pu Sena a rawn inkhawchhuah bawkw chuan boruak a thalo thei lo. Chumai a la ni lo, khuang rem leh rem loh pawh ngaihtuah lova, pi buhdeng ke thlawn ang maia Pu Bahadura kutbenga a lo suk uih uih bawkw chuan boruak a zangkhai riau thin. Thiamhnang lama chhuanawm tak te, solo thei mai te, hnathawk lova awm thiamlo emaw, tih mai tur, kut awl ngaithei miah lo te chenin; vanglai hun an dinthar leh a ni ber mai. An chaw lak pawh a la tha ve phian hlawm, a lawmawm lam a ni!

Tutenge kutthlak tawh : THQ-in sum tam tak sengin bul a tan. Hmun thar ngang a nih avangin thil tul zawng zawng erawh vawikhatah a tih vek theih loh. Heng a hnuaia tarlante hian kut rawn thlak ve ta lo se kalphung a khaihlak thei hial ang. A tesep thlenga kimchang taka tarlan erawh a buaithlak deuh.

1. Dinthar CO Bial SAY	:	` 2000.00
2. Chawlhmun CO Bial SAY	:	` 1325.00
3. Vengnuam Br. YMA	:	` 1000.00
4. Madanriting Corps SAY	:	` 3000.00
5. Baktawng Corps HL	:	` 2000.00
6. New Serchhip Corps	:	` 1000.00
7. Pu C. Zokhuma, Serchhip	:	` 2000.00
8. Pu K. Lalnunzira Salem Corps	:	` 1000.00
9. Thianho New Serchhip	:	` 1000.00
10. Serchhip DC	:	` 1000.00
11. Family Welfare Serchhip Hospt.	:	` 2000.00
12. Matana Saitual	:	` 100.00
13. Lianzuali Serchhip	:	` 500.00

Thawmhaw leh thildang

1. Serchhip Corps HL	:	Kekawr lum leh kawrlum
2. MHIP Sub-Hqtrs. Serchhip	:	Shawl/Blanker pan
3. Central 'N' Div. SAY	:	Rice Cooker 2
4. Thianho New Serchhip	:	Rizai 1
5. Mualpuikawn Corps HL	:	Artui 1 box
6. Dr. Malsawma CMO	:	Thosilen
7. Tv Andrew Khatla Corps	:	Thawmhaw
8. Pu Hriata Chhangte New Serchhip	:	Thawmhaw
9. Pi Vuani Chaltlang	:	Steel chawhtawh lian
10. New Serchhip Corps HL	:	Meihawl & Vawksa
11. Serchhip Damdawi In	:	Damdawi & Bungraw hrang hrang
12. Ebenezer Corps SAY	:	Ceiling fan 1
13. Bonton Aizawl	:	Dispo Cup 25 dz.
14. Pu Vanlalhuma Chaltlang	:	Chini 5 kgs.
15. Pu Rualthankhuma New Serchhip	:	Vawksa

He thu i chhiar laia i chhiar tel hman lohte pawh a awm ngei anga, io la chhiar zel turah ngai ang. Rawn tlawh tum leh thilpek hlan tum pawh in awm nual, nghakhlel takin Beiseina In hian a lo beisei che u. Ahmuna rawn kala i rawn hmuh ve hunah chuan, Salvation Army rawngbawlinaah i inthlahdah theihlohzia i hria anga, Sipaia awm tura thlangtu che i fak lo thei lo bawkw ang.

INDIA EASTERN TERRITORY HOME LEAGUE CONGRESS 2011

*Nukungi Zote
Congress Secretary
Home League Congress 2011, IET*

Territorial Home League Congress 2011 chu dt.25th – 27th February, 2011 khan Aizawl Temple Corps ah hlawhtling taka neih a ni. He hun min hmanpui tur hian IHQ, London atangin Commr. Lalkiamlova IS leh Commr. Lalhlmpuii ZSWM te an lokal a, anmahni atang hian Pathian thuchah nung tak leh min cho tak ngaihthlak a ni. Tin, Kolkata atangin War Cry Editor Major Sanjeevani leh Major Lalhriatpuii WACI Secretary te an lokal baw. Congress palai kal zat hi mi 4000 vel a record a ni.

Ni 25th February 2011 zan Welcome Meeting ah Colonel Lalngaihawmi TC/TPWM in Congress hawna a nei a, DDWM, DSWM leh THQ Women Officer ten SA Flag leh Home League Banner kengin biakinah an lo lut a, hetih lai hian Territorial Staff Band leh Territorial Songster ten Pathian fakna hla ropui takin an lo rem a. Hemi zawh hian Ebenezer Home League ten Salvation Army lo dintu pawimawh tak takte lem an entir a, an chanchin tawi sawi nghal a ni a, a hmuhawmin a bengvarthlak hle mai.

Ni 26th February 2011 (Inrinni) chawhnuah Variety Programme Vanapa Hall ah hlawhtling tak leh ropui taka neih a ni. Hetah hian Items chi hrang hrang – hnamzia pholang thei turte entir a ni a, Home League ten talent kan neih thatzia leh inpumkhatna a hlutzia min hriattir a ni.

Ni 27th February 2011 (Pathianni) Thianghlimna Inkhawmah Helping Hand Scheme lakkhawm a ni a. Rs.507662.00 lai hmuh a ni. Chawhnu lamah territory chhunga Buhfaitham tham tamte lawmman a siam chu heng mi pathumte hnenah hian hlan a ni.

1) Pi Lalthlamuani HLS Dawrpui Vengthar Corps No 25100

2) Pi Lalnunchami HLT Khawzawl Dinthar Corps No 21840

3) Pi R.Lalsangpuii HLS Hermon Corps No 11480

Hemi ni tlaiah Temple Corps atangin Territorial Staff Band leh Timbrel-ten hma hruaiin kawngzawh a ni a. Millenium Centre ah Mual Inkhawm ropui leh hlawhtling tak neih a ni a, hei hi congress hlawhtlinna pakhat a ni.

Congress neih chung zawng hian inkhawm vawi 7 neih ah vawi 6 thawhlawm lakkhawm a ni a, a vaiin Rs.70,213.00 hmuh a ni. Hetiang hi sum dinhmun a ni e.

Total Income	-	^ 7,26,573.00
Total Expenditure	-	^ 4,14,497.50
Balance	-	^ 3,12,076.50

Congress hian rahchhuah tur leh thurel ropui tak a nei a, chungte chu :-

- 1) Hmeichhe rahbi tleute tan Vocational/After care emaw a mamawhna ang engemaw tal tih nise.
- 2) Hangi Lunglen tlang tawngtaina hmunah a mamawh dan angin building sak ni baw se tih a ni.
- 3) Congress neih leh ngei nise, a hun atan Zoram Salvation Army in kum 2017 ah Centenary a lawm dawn a, chumi hunah chuan inkhawm vawikhat tal congress-na atan hman ve nise a ti baw.

Congress min hmanpui tura IHQ lama kan mi sawm leh beisei em em Commr. Sue Swanson WSWM leh Major Lynn Gibbs Administrator to WPWM and WSWM te Visa fel theihloh avangin an rawn kal theilo chu pawikan ti hle.

Reports :

Congress ah hian Home League thupui "Ramri piablam thlengin" tih hmanga Pathian thuchah nung leh awmze nei tak tak ngaihthlak thin a ni a, thuchah sawitute Commr.Lalkiamlova IS, Commr.Lahlimpuii ZSWM, Colonel Lalngaihawmi TC/TPWM, Major Thantluangi THLS leh Pi

H.Lalnuntluangi CCM te an ni a, heng mite hi congress hlawhtlinna hmanruate an ni.

India Eastern Territory ah hian Annual Shield Division tithate hna semchuhah thin chu Central South Division hnenah pekchuhah leh a ni.

Division titha ber hna ZSWM-in Shield Central South Division DDWM hna a hlan lai

Buhfai tham lawmman pakhatna dawngtu Pi Lalthlamuani HLS Dawrpui Vengthar Corps No 25100



Buhfai tham lawmman pahnhna dawngtu Pi Lalnunchami HLT Khawzawl Dinthar Corps No 21840

Buhfai tham lawmman 3-na dawngtu Pi R.Lalsangpuii HLS Hermon Corps No 11480



CHANCHIN LAWRKHAWM

CENTRAL NORTH DIVISION OFFICER RETREAT : Aizawl Central North Division chuan, Ni 14-15May 2011 khan, D.H.Q Building hnuaiah Officer Retreat hmangin, Nula Nuhliri YPSM Khatla chu Speaker atan an hmang a, Officer 62 te chuan Malsawmna thar tam tak an dawng. He Retreat-ah hian Thupui chi hrang hrang, Puithiam nitura kohna, Puithiamte



chanvo, Puithiam nun, Inpumkhatna tih chu thahnemngai taka sawi chu an ngaithla a, inkhawm hnu hnung ber erawh chu Colonel Lalngaihawmi T.C chuan T.H.Q Executive thenkhatte hruaiin a hmanpui a, Pathian rawngbawl turin Officerte chuan an nun an hlan thar leh vek a ni.

LUNGLEI CORPS : Lunglei Corps chuan Kum 1997 atanga Operetion Nehemia an lo neih thin chu, a tum thumna atan Kum 2011 hian Southern Division chungga Corps hrang hrang 10-ah an feh chhuak a, Hei hian Sipai tam tam a tichakin a cho phur tha hle ani. He rawngbawl na atang hian hmun tam takah Sipai Pawl Hla tha tak tak sa thiam lo an tam zia hmuh chhuah a ni a, Audio Casatte siamin hla tam tak an khung zui ta a, chu chu Southern Division-ah Indona Laipui atan hman tangkai tumin an sem darh mek a ni.

PASIGHAT SOCIETY : May Ni 8 2011ah Mothers Day benglut takin an hmang a, Kohran dang leh Non Kristian pawhin an chhim ve a, an hlim tlang hle. He mi Ni vek hian Non Kristian Nupa Bijoy Yomso leh a nupui Yalik Padung chu Sipai Pawlah lawm luh an ni bawk.

MEMBER THAR LAWM LUHNA : Yasang Nonang, leh Mr. Wanglet Bagra Bilat Society a Non kristian te chu Ni 24.4.2011 khan Major Lianthanga C.O chuan member-ah a lawmlut.

THINGSULTHLIAH CORPS : Thingsultlhiah Corps C.O Quarters, ` 725,168.00 senga sak chu, Ni 8.5.2011 khan, Colonel Lalngaihawmi T.C chuan hawngin Pathian hnenah a hlanna hun a hmang. Maj Lalhmingliana D.C, Major J.C Lalengmawia D.S leh Cap.Ramropuinghaki DYS te chuan an tawiawm. He Biak In hi Mission Support ` 2,65,000.00 leh Tualchhung Corps bakah, Mimal Major Rothiangi ® te, Dr. Zonunsanga Khiangte, Pu V.L Hmuaka Chanmary West te chuan nasa takin antanpui bawk a an chungga Corps mipui an lawm hle ani.

TRIPURA RAMTHAR : Heng ahnuai hmun hrang hrangah hian Kum 2011(Jan-May) chhungin Centre thar hawngin Salvation Army zawm thar an awm, chungte chu :



Agha Saimarua khuaah Member 66, Burchuhathai khuaah member 75, Lungphun khuaah member 62, Tangpui khuaah member 65, Thankhua 1-ah Member 26, Thankhua 11-ah member 24, leh Hajiradon khuaah member 43 te chu Sipai pawlah lawm luh an ni.

CHAWNGTE CORPS ANNIVERSARY : Ni 23.4.2011 khan, Chawngte Corps chuan Kum 10 an nih champha ropui takin an lawm. Kum 1993ah Capt. K. Lalrinawma C.O Lunglei Corps chu Sipai Pawl hminga rawngbawl na laneih lohna hmun Chawngte khuaah hian kalin chanchin tha hrilin tum hnih a feh

chhuak a, Kum 2001 khan Chawngte khuaah Salvation Army a lo piang ta a ni. Pu Lalthantluanga SDO (C) chu sorkar hna thawkin an chhungkua an pem lut a, nasa takin Pathianin a hmang a, a thahnemngaihna kal tlangin member 7 te chuan inkhawmna bul tannin, Salvation Army a lo ding thei ta a. Kum 10 an lo tlinna lawman hun hi Major C.Dawngliana D.C chuan a hmanpui. A lawman senso zawng zawng hi Pu Lalramhluna SDO, PWD te, Pu Lalthlamuana J.E, PWD te, Dr.Johny C.Laldinpuia C.H.C te chuan an tum vek a, raqwngbawlna benglut tak an hmang ho ani.

SERCHHIP CORPS : Kum 2011 Good Friday leh Easter Sunday hmangin Serchhip Corps chuan Silchar City Corps leh Hmarkhawlian Corps an tlawh. He tih hun chhung hian Rel station leh Gungoor Hospitalah Bible tract leh Bible an sem chhuak a, Silchar Boys Home tan Seiling Fun 3 an lei sak bawk. Hmun hla lama kal lo te chuan Serchhip Damdawi In-ah Eitur semin tawngtai rawngbawlna hun an hmang bawk.

NEW SERCHHIP CORPS : Serchhip Corps chuan Ngentiang Corps tlawhin mi 38 lai an feh chhuak a, Capt. R.Lalringgheta C.O leh Maj.Saitluanga te chuan thahnemngai takin Pathian thuchah anpuang chhuak. Tin, serchhip Corps hian, Zoram Sipai Pawl Ni Khan, Aduld Rehabilitation Centre chhiahtlang leh Catherine Booth Home for the Aged (Tar enkawlna) hmun New Serchhip chu tlawhin tanpuina thilpek an hlan.

THINGFAL CORPS : Kum 1971-a sak tawh Biak In hlui chu thatin, tunah Biak In thar tur an sa tan



mek. He Biak In thar sak nan hian T.H.Q chuan ` 4,02,185.00-in a tanpui a, Sipai te an phur tlang hle.

Biak In an sak zawh hunah Pu,F,Kapsanga C.T Temple Corps chuan a chung a tum sak dawn a vangin Sipai te an lawm tak meuh meuh a, hun rei lote chhungin sak zawh thuai an tum a ni.

ZAWLNUAM CORPS : Zawlnuam Corps chuan, Evan Challiangthanga leh a Team ruaiin, Camping chhawng thum an nei.. Speaker hian Sipai Pawl Thurin 10na tlawhchhanin, Tih Thianghlimna, Thlarau, Rilru leh Taksa tih Thupui hmanga Thuchah a sawite chuan Thlarau Thianghlim hnathawh nasa takin a thlen tir, Campingah hian Kohran hrang hrang atangin chhimtu pawh an kal thahnem hle

SILCHAR BOYS HOME : Silchar BoysHome-ah hian naupang 17 an awm mek a, 20 awm theihna tura ruahman ani. Naupangte hi hnam hrang

hrang, Bengali, Kuki, Bru, Hrangkhawl-te an ni. Jan-April 2011 c h h u n g i n tlawhtu an neite chuan thilpek an hlan thin a, Officer Incharge leh a chhunga chengte an lawm hle. Champhai Corps SAY chuan Rs 3000.00; D.H.Q Western Division chuan Rs 2500.00; Pi,laltanpuui Lily veng Corps chuan Rs 1000.00 pein, Chandmary Corps LOM chuan T.Shirt 17 leh Chapal 17; Serchhip Corps chuan Ceiling Fan 3 leh 2 Bag; Estheri Durtlang chuan 20 Pocket Rumpum; Rohmingthangi Durtlang chuan 20 Pocket Rumpum; Pu Pazawna(Bank Manager) City Corps te chuan 17 Water Bucket leh 17 Mugs an hlan bawk. Tin, April 27 2011 khan Colonel lalngaihawmi T.C chuan tlawhin, Board a neih pui a, Home upgrade dan tur chungchang leh thil pawimawh dangte a rel pui a, Naupang infiamnatur atan Volley Ball a hlan nghal bawk.



HIMALAYAN DIVISION OFFICER MEETING : Ni 6&7 April 2011 khan, Himalayan Division Officer Meeting pawimawh tak an nei.He meetingah hian Officerte'n Sharing leh Vision an neih angte sawi chhuakin, Major S.T Dula D.C chuan Thuchah sawiin, Officer zawng zawngte chuan inhlan tharna hun an nei. He thuziak chhiartu zawng zawngte

chu Himalayan Division, Ramthim rawngbawlinaa Officer te tan leh pathian ram a lo zau zel theih nan tawngtai turin kan sawm a che u.

OFFICER CAMPAIGN REPORT : April Ni 28-1st May 2011 chhung khan, Southern Divisiona Officer zawng zawngte chu, Major C. Dawngliana D.C hovin, Salvation Army din lohna hmun hrang hrangah, hmun hnihah inthenin an feh chhuak. Lungpher khua a t a n g i n Siachangkawn, V a w m b u k , C h e u r a l , S. Vanlaiphai, S. Bungtlang, Diltlang, khuah kalin, Sipai pawl awmna khua an tlawh tel zel bawka, Muallai Rawngbawlina vawi 22 leh Biak In chhung inkhawmna



vawi 6 lai neiin, Hmun kilkhawr tak tak hrut chhuakin rawngbawlina an nei a, Lehkhabu an neih ang angte ansem chhuak bawka.

CENTRAL NORTH DIVISION L.O.M HMALAKNA : Aizawl Central North Division chhunga hmeichhe lam rawngbawlina peng chi khat, League of Mercy chuan, a hnuai mi, tanpui ngai tak takte hnenah hian thlatin Rs 1,000.00 theuh enkawlina a pe thin. Chung mite chu:

1. Lalrinchhana Darlawn: Taksa zeng a ni a, a nu tar tawh tak nena awm an ni.
2. Pi Runkailovi Phunchawng: Kum 80 mi a ni a, fa 2, mitdel leh tawngthei lo a nei.
3. Pi Phuntlemi Ramhlun South: Kum upa tawh lam a ni a, a fapa hna thawk thei lo, accident tawk tawh nena khawsa an ni.
4. Pi Ramchhani Chanmari West: A keruh a tliak a, a tute 2 nena khawsa a ni.

Pu Vanlalphenah Zemabawka: Accident a tawh atangin a zeng a, mi In luahin chhangchhe taka khawsa mek an ni.



Ropuinaa kaisangte

1. R. LALKHUMA (KUM 70) BETHEL CORPS, AIZAWL : Senior Captain Chawia leh Senior Capt. Chani fa 12 te zinga 4-na ni in Kolasib-ah a piang a, an unau mikpa zinga upa ber a ni. Mizoram buai avang khan January 1968-ah Vaitin atangin Ramhlun vengah an pem lut a, Kum 1970-ah NI. K.L. Sawiluaii nen an innei a, fapa pahnih leh fanu pathum an nei.



Bethel Corps a lo din atang khan chatlak awm lovin Corps Council Member a ni thin a. Missionary Board-ah Vice Chairman, Treasurer leh Member-te niin, Ropuinaa a kaisan ni thlengin thahnemngai taka rawngbawltu a ni. Rawngbawlina ngai pawimawhtu a nih avang hian a fate leh a unau pawh Aizawl Bethel Corps-ah Corps kut-ke pawimawh ber berte an ni. Khawtlang rorelna ah pawh V.C Term li-ah thlan tlin a ni tawhin, Term khat phei chu Vice President-ah ruat ani.

Nat lawk em em pawh nei lovin a pum lam a sawisel a, Doctor hnena a inentir hnuah Ni 10.4.2011-ah a Irhfiak a, Ni 16.4.2011-ah Synod Hospital, Durtlang-ah admit a ni a, a natna an han enchian chuan Cancer a ni tih hriat a ni a. Durtlang atanga lo chhuakin inah enkawl leh a nih hnuah Ni 5.5.2011 khan Grace Nursing Home-ah admit leh a ni a. Ni 22.5.2011

Inkhawm peih tak, hnatlang leh Corps-in thawh tur a neih reng rengah a hmahruaitu ber thin a ni. Aizawl

chawhnu dar 12:07 khan a lei ralthuamte dahin hlim taka rawng a lo bawlsak thin a Lalpa hnenah chatuana chawl turin Ropuinaah a lo kaisang ta. Major Liansanga C.O chuan thlamuanna thuchah sawiin a vui liam. A chhungte zawng zawng Lalpa'n thlamuanin awmpui zel rawh se.

2. **PI VANLALSAWMI (KUM 48) TEMPLE CORPS :** Pu R.Z Thangchhuaka (L) fanu niin Pu K.S Thanga nen kum 1985, December, Ni 14-ah an innei a, Fapa 3, Fanu 1 leh Tu 2 a nei a. S.E. P.W.D-ah thawkin, Stenographer a ni a, a borat thleng hian he a hna hi a chelh a ni.



Pi Masawmi hian pasal a neih hma hi chuan Presbyterian Kohhran Venghlui-ah Naupang lamah leh Thalai lamah inhmangin rawngbawltu pawimawh tak a ni a, Pastor Liandova tunu a ni a, pasal Salvation Army tlangval a neih hnu hi chuan a pasal awmna Kohhran (S.A)-ah hian a tui em em mai a, Uniform hak te hi a ngaina in mawi a ti a, Sipai Pawla rawngbawl hi nuam a ti hle a ni.

Temple Corps-ah LOM din a nih tirh khan, Secretary hmasaber a ni a, rawngbawlna ngai pawimawh mi leh thilpekah thahnemngai, mi thilphal a ni.

June 2007 thla atang khan a insawisel a, Doctor thiam te inentirin a natna chu Ovarian Cyst a ni a, Vellore a CMC Hospital te pan in Bangalore-a Cyberknife treatment te la in a lo thatchhuah lehna tur hian mihring lamah chuan a pasal Pu K.S Thanga hian theihtawp tak meuh a chhuah a, mahse Pathian remruat chu danrual ni hek lo le, Vankohna chhangin Ni 4.5.2011 khan a ralthuam dahin Isua ke bula chawl turin Ropuina ramah a chawl ta. Amah thlahna Inkhawm hi Aizawl Central Hall-ah Ni 5.5.2011 chhun dar 12:00-ah neih a ni a, Maj. Lalhmingliana D.C chuan thlamuanna thuchah

a sawi a, Thlanmualah Bialtu Commanding Officer, Major Romawia chuan a vui liam. Temple Corps chuan an ui hle. A pasal leh tu leh fate zawng zawng Lalpa'n awmpuiin thlamuan zel rawh se.

3. **PU THANHRANGA (KUM 84) BUHCHANGPHAI CORPS :** Buhchangphai a Chhandamna Sipai Pawl rawngbawlna a bultantu pawimawh tak, Pu Piangliana (L) leh Pi Ngaudengi (L) fate zinga 3 na chu kum 1927 February thla khan Tachhip khuaah a piang a, an chhungkua hi Sipai Pawl mi an ni.



Assam Regiment ah te tangin chumi hnuah Ex-service tana Buhchangphai theh a nih atangin a sul sutu a ni a, Zamanhmawng an sawi huai huai pawh hi a Leilet hmun a ni nghe nghe.

Kum 1955 khan Pi Lalsiamliani nen an innei a, Fa 6 lai neiin, Lt. David Lalthazuala C.O Kanchanchera Bialtu hi a tupa a ni a, Kum 1957ah Buhchangphaiah Salvation Army an din a, Hun rei tak chhung Corps Treasurer hna a chelh hnuin, C.S.M hna a chelh leh a ni.

Kum 2001 atangin hrisellohna in a tlakbuak a, CSM nihna pawh chu a chawlhsan ta nghe nghe a ni. A hrisellohna chu lo zual zel in Ni 7 May, 2011 Sar 12:30 A.M khan Ropuina ramah min lo kal san ta. Ni 8.5.2011ah vuina hun hmangin, In lamah Pu V.L Lawma CSM chuan thlahna hun a hmang a, Biak Inah inkhawmna neihpui a niin, Maj. Rualchungnunga Bialtu C.O chuan inkhawm a kaihruai a, Maj. S. Biakliana D.C chuan thlamuanna thuchah sawiin a thlah liam ta. A nupui leh a tu leh fate zawng zawng Lalpa'n thlamuanin awmpui zel rawh se.